

居士菩薩誦戒戒本

優婆塞五戒威儀經

梵網經菩薩戒本

黑月



六祖寺

LiuZu Temple Sutra Printing Center

印经中心

廣東四會六祖寺恭印



南無本師釋迦牟尼佛



南無盧舍那佛

目錄

誦戒儀軌	一
梵網經菩薩戒	四
優婆塞五戒威儀經	八七
回向	一三五

誦戒儀軌

一、白誦戒時地

大德菩薩優婆塞（夷）聽！今白（黑）月十五（四）日布薩，白菩薩優婆塞（夷）眾，於某時，集某佛殿，誦菩薩戒，白如是。

二、爐香贊

爐香乍爇，法界蒙熏，諸佛海會悉遙聞，
隨處結祥雲，誠意方殷，諸佛現全身
南無香雲蓋菩薩摩訶薩（三稱）

三、開經偈

南無千華臺上盧舍那佛（三稱）

三聚淨戒難得聞，經於無量俱胝劫；
讀誦受持亦如是，如說修行者更難。

四、謙禮白眾

某甲稽首和南，敬白大眾，菩薩戒眾差誦戒，
恐有差誤，願同誦者，慈悲指示。

五、正誦戒文

梵網經菩薩戒

菩薩戒眾等諦聽。

歸命盧舍那 十方金剛佛
亦禮前論主 當覺慈氏尊
今說三聚戒 菩薩咸共聽
戒如大明燈 能消長夜闇
戒如真寶鏡 照法盡無遺

戒如摩尼珠

yù雨物濟貧窮

離世速成佛

惟此法為最

是故諸菩薩

應當勤護持

老死至近。佛法欲滅。諸大德。為得道故。一心勤求精進。所以者何。諸佛一心勤求精進故。得阿耨多羅三藐三菩提。何況餘善道法。各聞強健時。努力勤修善。如何不求道。安可須待老。欲何

樂乎。

是日已過。命已隨減。如少水魚。斯有何樂。

梵網經菩薩戒序

諸佛子等。合掌至心聽。我今欲說諸佛大戒序。眾集默然聽。自知有罪當懺悔。懺悔即安樂。不懺悔。罪益深。無罪者默然。默然故。當知眾清淨。諸大德諦聽。佛滅度後。於像法中。應當尊敬。

波羅提木叉。波羅提木叉者。即是此戒。持此戒時。如闍遇明。如貧人得寶。如病者得瘥。如囚繫出獄。如遠行者得歸。當知此則是眾等大師。若佛住世。無異此也。怖心難生。善心難發。故經雲。勿輕小罪。以為無殃。水滴雖微。漸盈大器。剎那造罪。殃墮無間。一失人身。萬劫不復。壯色不停。猶如奔馬。人命無常。過於山水。今日雖存。明亦難保。眾等各各一心勤求精進。慎勿懈怠懶惰。

睡眠縱意。夜即攝心。存念三寶。莫以空過。徒設疲勞。後代深悔。眾等各各一心謹依此戒。如法修行。應當學。

諸大德。今黑（白）月十五（四）日。作布薩說菩薩戒。眾當一心善聽。有罪者發露。無罪者默然。默然故。當知諸大德清淨。堪說菩薩戒。已說菩薩戒序竟。今問諸大德。是中清淨否。

諸大德。是中清淨。默然故。是事如是持。

梵網經佛說菩薩十重四十八輕戒

姚秦三藏法師鳩摩羅什譯

爾時盧舍那佛。為此大眾。畧開百千恒河沙。
不可說法門中心地如毛頭許。是過去一切佛已說。
未來佛當說。現在佛今說。三世菩薩已學。當學。
今學。我已百劫修行是心地。號吾為盧舍那。汝

諸佛轉我所說。與一切眾生開心地道。爾時蓮花臺世界。赫赫天光師子座上盧舍那佛放光。光告千華上佛。持我心地法門品而去。復轉為千百億釋迦。及一切眾生。次第說我上心地法門品。汝等受持讀誦。一心而行。

爾時千華上佛。千百億釋迦。從蓮華臺藏世界。赫赫師子座起。各各辭退。舉身放不可思議光。光皆化無量佛。一時以無量青黃赤白華供養盧

舍那佛。受持上說心地法門品竟。各各從此蓮華臺藏世界而沒。沒已。入體性虛空華光三昧。還本源世界。閻浮提。菩提樹下。從體性虛空華光三昧出。出已。方坐金剛千光王座。及妙光堂。說十世界海。復從座起。至帝釋宮說十住。復從座起。至燄天中。說十hèng行。復從座起。至第四天。說十回向。復從座起。至化樂天。說十禪定。復從座起。至他化天。說十地。復至一禪中。說十金剛。復至

二禪中。說十忍。復至三禪中。說十願。復至四禪中。摩醯首羅天王宮。說我本源蓮華臺藏世界。盧舍那佛所說心地法門品。其餘千百億釋迦。亦復如是。無二無別。如賢劫品中說。

爾時釋迦牟尼佛。從初現蓮華臺藏世界。東方來入天王宮中。說魔受化經已。下生南閻浮提。迦夷羅國。母名摩耶。父字白淨。吾名悉達。七歲出家。三十成道。號吾為釋迦牟尼佛。於寂滅道場。

坐金剛華光王座。乃至摩醯首羅天王宮。其中次第十住處所說。

時佛觀諸大梵天王。網羅幢。因為說無量世界。猶如網孔。一一世界。各各不同。別異無量。佛教門亦復如是。吾今來此世界八千返。為此娑婆世界。坐金剛華光王座。乃至摩醯首羅天王宮。為是中一切大眾。畧開心地法門竟。復從天王宮。下至閻浮提菩提樹下。為此地上一切眾生。凡夫癡暗。

之人。說我本盧舍那佛心地中。初發心中。常所誦一戒。光明金剛寶戒。是一切佛本源。一切菩薩本源。佛性種子。一切眾生。皆有佛性。一切意識色心。是情是心。皆入佛性戒中。當當常有因故。當當常住法身。如是十波羅提木叉出於世界。是法戒。是三世一切眾生頂戴受持。吾今當為此大眾。重說無盡藏戒品。是一切眾生戒。本源自性清淨。

我今盧舍那 方坐蓮華臺

周匝千華上

復現千釋迦

一華百億國

一國一釋迦

各坐菩提樹

一時成佛道

如是千百億

盧舍那本身

千百億釋迦

各接微塵眾

俱來至我所

聽我誦佛戒

甘露門即開

是時千百億

還至本道場

各坐菩提樹

誦我本師戒 十重四十八
戒如明日月 亦如纓絡珠
微塵菩薩眾 由是成正覺
是盧舍那誦 我亦如是誦
汝新學菩薩 頂戴受持戒
受持是戒已 轉授諸眾生
諦聽我正誦 佛法中戒藏
波羅提木叉 大眾心諦信

汝是當成佛 我是已成佛
常作如是信 戒品已具足
一切有心者 皆應攝佛戒
眾生受佛戒 即入諸佛位
位同大覺已 真是諸佛子
大眾皆恭敬 至心聽我誦

爾時釋迦牟尼佛。初坐菩提樹下。成無上正覺已。初結菩薩波羅提木叉。孝順父母師僧三寶。孝

順至道之法。孝名為戒。亦名制止。佛即口放無量光明。是時百萬億大眾。諸菩薩。十八梵天。六欲天子。十六大國王。合掌至心。聽佛誦一切諸佛大乘戒。

佛告諸菩薩言：我今半月半月自誦諸佛法戒。汝等一切發心菩薩。乃至十發趣。十長養。十金剛。十地。諸菩薩亦誦。是故戒光從口出。有緣非無因故光。光非青黃赤白黑。非色非心。非有非

無。非因果法。是諸佛之本源。行菩薩道之根本。是大眾諸佛子之根本。是故大眾諸佛子。應受持。應讀誦。應善學。

佛子諦聽。若受佛戒者。國王。王子。百官。宰相。比丘。比丘尼。十八梵天。六欲天子。庶民。黃門。婬男。婬女。奴婢。八部鬼神。金剛神。畜生。乃至變化人。但解法師語。盡受得戒。皆名第一清淨者。

佛告諸佛子言。有十重波羅提木叉。若受菩薩戒。不誦此戒者。非菩薩。非佛種子。我亦如是誦。一切菩薩已學。一切菩薩當學。一切菩薩今學。已畧說菩薩波羅提木叉相貌。應當學。敬心奉持。

第一殺戒

佛言。若佛子。若自殺。教人殺。方便殺。讚

歎殺。見作隨喜。乃至咒殺。殺因。殺緣。殺法。
殺業。乃至一切有命者。不得故殺。是菩薩應起常
住慈悲心。孝順心。方便救護一切眾生。而反自恣
心快意殺生者。是菩薩波羅夷罪。

第二盜戒

若佛子。自盜。教人盜。方便盜。咒盜。盜
因。盜緣。盜法。盜業。乃至鬼神有主。劫賊物。

一切財物。一針一草。不得故盜。而菩薩應生佛性。
孝順心。慈悲心。常助一切人生福生樂。而反更盜
人財物者。是菩薩波羅夷罪。

第三婬戒

若佛子。自婬。教人婬。乃至一切女人。不得
故婬。婬因。婬緣。婬法。婬業。乃至畜生女。諸
天鬼神女。及非道行婬。而菩薩應生孝順心。救度

一切眾生。淨法與人。而反更起一切人婬。不擇畜生。乃至母女姊妹六親行婬。無慈悲心者。是菩薩波羅夷罪。

第四妄語戒

若佛子。自妄語。教人妄語。方便妄語。妄語因。妄語緣。妄語法。妄語業。乃至不見言見。見言不見。身心妄語。而菩薩常生正語正見。亦生一

切眾生正語正見。而反更起一切眾生邪語邪見邪業者。是菩薩波羅夷罪。

第五酤酒戒

若佛子。自沽酤酒。教人酤酒。酤酒因。酤酒緣。酤酒法。酤酒業。一切酒不得酤。是酒起罪因緣。而菩薩應生一切眾生明達之慧。而反更生一切眾生顛倒之心者。是菩薩波羅夷罪。

第六說四眾過戒

若佛子。口自說出家。在家菩薩。比丘。比丘尼。罪過。教人說罪過。罪過因。罪過緣。罪過法。罪過業。而菩薩聞外道惡人。及二乘惡人。說佛法中非法非律。常生慈心。教化是惡人輩。令生大乘善信。而菩薩反更自說佛法中罪過者。是菩薩波羅夷罪。

第七自讚毀他戒

若佛子。自讚毀他。亦教人自讚毀他。毀他因。毀他緣。毀他法。毀他業。而菩薩應代一切眾生受加毀辱。惡事向自己。好事與他人。若自揚己德。隱他人好事。令他人受毀者。是菩薩波羅夷罪。

第八慳惜加毀戒

若佛子。自慳。教人慳。慳因。慳緣。慳法。

慳業。而菩薩見一切貧窮人來乞者。隨前人所須。
一切給與。而菩薩以惡心瞋心。乃至不施一錢一針
一草。有求法者。不為說一句一偈一微塵許法。而
反更罵辱者。是菩薩波羅夷罪。

第九瞋心不受悔戒

若佛子。自瞋。教人瞋。瞋因。瞋緣。瞋法。

瞋業。而菩薩應生一切眾生善根無諍之事。常生慈

悲心。孝順心。而反更於一切眾生中。乃至於非眾生中。以惡口罵辱。加以手打。及以刀杖。意猶不息。前人求悔。善言懲謝。猶瞋不解者。是菩薩波羅夷罪。

第十謗三寶戒

若佛子。自謗三寶。教人謗三寶。謗因。謗緣。謗法。謗業。而菩薩見外道。及以惡人。一言

謗佛音聲。如三百矛刺心。況口自謗。不生信心。
孝順心。而反更助惡人。邪見人謗者。是菩薩波羅
夷罪。

善學諸仁者。是菩薩十波羅提木叉。應當學。
於中不應一一犯如微塵許。何況具足犯十戒。若有
犯者。不得現身發菩提心。亦失國王位。轉輪王
位。亦失比丘。比丘尼位。亦失十發趣。十長養。
十金剛。十地。佛性常住妙果。一切皆失。墮三惡。

道中。二劫。三劫。不聞父母三寶名字。以是不應
一一犯。汝等一切菩薩。今學。當學。已學。如是
十戒。應當學。敬心奉持。八萬威儀品當廣明。

佛告諸菩薩。已說十波羅提木叉竟。四十八輕
今當說。

第一不敬師友戒

若佛子。欲受國王位時。受轉輪王位時。百官

受位時。應先受菩薩戒。一切鬼神。救護王身。百
官之身。諸佛歡喜。既得戒已。生孝順心。恭敬
心。見上座。和尚。阿闍黎。大德。同學。同見。
同行者。應起承迎禮拜問訊。而菩薩反生憍心。慢
心。癡心。瞋心。不起承迎禮拜。一一不如法供
養。以自賣身。國城男女。七寶百物。而供給之。
若不爾者。犯輕垢罪。

第二飲酒戒

若佛子。故飲酒。而酒生過失無量。若自身手過酒器與人飲酒者。五百世無手。何況自飲。亦不得教一切人飲。及一切眾生飲酒。況自飲酒。一切酒不得飲。若故自飲。教人飲者。犯輕垢罪。

第三食肉戒

若佛子。故食肉。一切眾生肉不得食。夫食肉

者。斷大慈悲佛性種子。一切眾生。見而捨去。是故一切菩薩。不得食一切眾生肉。食肉得無量罪。若故食者。犯輕垢罪。

第四食五辛戒

若佛子。不得食五辛。大蒜。薑。葱。慈。蔥。蘭。葱。興渠。是五辛。一切食中不得食。若故食者。犯輕垢罪。

第五不教悔罪戒

若佛子。見一切眾生犯八戒。五戒。十戒。毀禁。七逆。八難。一切犯戒罪。應教懺悔。而菩薩不教懺悔。同住。同僧利養。而共布薩。一眾說戒。而不舉其罪。不教悔過者。犯輕垢罪。

第六不供給請法戒

若佛子。見大乘法師。大乘同學。同見同行。

來入僧坊。舍宅城邑。若百裏千裏來者。即起迎來。送去。禮拜供養。日日三時供養。日食三兩金。百味飲食。牀座醫藥。供事法師。一切所須。盡給與之。常請法師。三時說法。日日三時禮拜。不生瞋心。患惱之心。為法滅身。請法不懈。若不爾者。犯輕垢罪。

第七懈怠不聽法戒

若佛子。一切處。有講法毘尼經律。大宅舍中

有講法處。是新學菩薩。應持經律卷。至法師所。
聽受諮問。若山林樹下。僧地房中。一切說法處。
悉至聽受。若不至彼聽受諮問者。犯輕垢罪。

第八背大向小戒

若佛子。心背大乘常住經律。言非佛說。而受
持二乘聲聞外道惡見。一切禁戒邪見經律者。犯輕
垢罪。

第九不看病戒

若佛子。見一切疾病人。常應供養。如佛無異。八福田中。看病福田。是第一福田。若父母。師僧弟子病。諸根不具。百種病苦惱。皆供養令差。而菩薩以瞋恨心不看。乃至僧坊。城邑。曠野。山林。道路中。見病不救濟者。犯輕垢罪。

第十畜殺眾生具戒

若佛子。不得畜一切刀。杖。弓箭。矛。斧。

鬥戰之具。及惡網羅罠。殺生之器。一切不得畜。
而菩薩乃至殺父母。尚不加報。況殺一切眾生。不
得畜殺眾生具。若故畜者。犯輕垢罪。

如是十戒。應當學。敬心奉持。下六度品中廣明。

第十一國使戒

若佛子。不得為利養惡心故。通國使命。軍陣
合會。興師相伐。殺無量眾生。而菩薩尚不得入軍

中往來。況故作國賊。若故作者。犯輕垢罪。

第十二販賣戒

若佛子。故販賣良人奴婢六畜。市易棺材板木盛死之具。尚不應自作。況教人作。若故自作。教人作者。犯輕垢罪。

第十三謗毀戒

若佛子。以惡心故。無事謗他良人。善人。法

師。師僧。國王。貴人。言犯七逆十重。於父母兄弟六親中。應生孝順心。慈悲心。而反更加於逆害。墮不如意處者。犯輕垢罪。

第十四放火焚燒戒

若佛子。以惡心故。放大火燒山林曠野。四月乃至九月放火。若燒他人家屋宅城邑僧坊田木。及鬼神官物。一切有生物。不得故燒。若故燒。

者。犯輕垢罪。

第十五僻教戒

若佛子。自佛弟子。及外道惡人。六親。一切善知識。應一一教受持大乘經律。應教解義理。使發菩提心。十發趣心。十長養心。十金剛心。於三心中。一一解其次第法用。而菩薩以惡心瞋心。橫教二乘聲聞經律。外道邪見論等。犯輕垢罪。

第十六為利倒說戒

若佛子。應好心先學大乘威儀經律。廣開解義味。見後新學菩薩。有從百裏千裏來求大乘經律。應如法為說一切苦行。若燒身燒臂燒指。若不燒身臂指供養諸佛。非出家菩薩。乃至餓虎狼師子。一切餓鬼。悉應捨身肉手足而供養之。然後一一次第為說正法。使心開意解。而菩薩為利養故。應答不答。倒說經律文字。無前無後。謗三寶說者。犯輕垢罪。

第十七恃勢乞求戒

若佛子。自為飲食錢財利養名譽故。親近國王王子。大臣百官。恃作形勢。乞索打拍牽挽。橫取錢物。一切求利。名為惡求多求。教他人求。都無慈心。無孝順心者。犯輕垢罪。

第十八無解作師戒

若佛子。應學十二部經。誦戒者。日日六時持

菩薩戒。解其義理。佛性之性。而菩薩不解一句一偈。及戒律因緣。詐言能解者。即為自欺誑。亦欺誑他人。一一不解。一切法不知。而為他人作師授戒者。犯輕垢罪。

第十九兩舌戒

若佛子。以惡心故。見持戒比丘。手捉香爐。行菩薩行。而鬥遘兩頭。謗欺賢人無惡不造者。

犯輕垢罪。

第二十不行放救戒

若佛子。以慈心故。行放生業。一切男子是我父。一切女人是我母。我生生無不從之受生。故六道眾生。皆是我父母。而殺而食者。即殺我父母。亦殺我故身。一切地水。是我先身。一切火風。是我本體。故常行放生。生生受生。常住之法。教人

放生。若見世人殺畜生時。應方便救護。解其苦難。常教化講說菩薩戒。救度眾生。若父母兄弟死亡之日。應請法師講菩薩戒經律。福資亡者。得見諸佛。生人天上。若不爾者。犯輕垢罪。

如是十戒。應當學。敬心奉持。如滅罪品中廣明一一戒相。

第二十一 瞪打報仇戒

若佛子。不得以瞋報瞋。以打報打。若殺父母

兄弟六親。不得加報。若國主為他人殺者。亦不得
加報。殺生報生。不順孝道。尚不畜奴婢。打拍罵
辱。日日起三業。口罪無量。況故作七逆之罪。而
出家菩薩。無慈心報仇。乃至六親中故報者。犯輕
垢罪。

第二十二 懈慢不請法戒

若佛子。初始出家。未有所解。而自恃聰明有

智。或恃高貴年宿。或恃大姓高門。大解大福。大富饒財七寶。以此嬌慢。而不諮詢受先學法師經律。其法師者。或小姓。年少。卑門。貧窮。下賤。諸根不具。而實有德。一切經律盡解。而新學菩薩。不得觀法師種姓。而不來諮詢受法師第一義諦者。犯輕垢罪。

第二十三 懈慢僻說戒

若佛子。佛滅度後。欲以好心受菩薩戒時。於

佛菩薩形像前。自誓受戒。當以七日佛前懺悔。得見好相。便得戒。若不得好相。應二七三七。乃至一年。要得好相。得好相已。便得佛菩薩形像前受戒。若不得好相。雖佛像前受戒。不名得戒。若先受菩薩戒法師前受戒時。不須要見好相。何以故。是法師。師師相授。故不須好相。是以法師前受戒時。即得戒。以生至重心故。便得戒。若千裏內無能授戒師。得佛菩薩形像前自誓受戒。而要見好

相。若法師自倚解經律。大乘學戒。與國王太子百官以為善友。而新學菩薩來問。若經義律義。輕心惡心慢心。不一一好答問者。犯輕垢罪。

第二十四不習學佛戒

若佛子。有佛經律大乘法。正見。正性。正法身。而不能勤學修習。而捨七寶。反學邪見。二乘。外道。俗典。阿毗曇。雜論。一切書記。是斷

佛性。障道因緣。非行菩薩道者。若故作者。犯輕垢罪。

第二十五不善知眾戒

若佛子。佛滅度後。為說法主。為行法主。為僧坊主。教化主。坐禪主。行來主。應生慈心。善和鬥訟。善守三寶物。莫無度用。如自己有。而反亂眾鬥諍。恣心用三寶物者。犯輕垢罪。

第二十六獨受利養戒

若佛子。先在僧坊中住。後見客菩薩比丘。來入僧坊。舍宅城邑。若國王宅舍中。乃至夏坐安居處。及大會中。先住僧應迎來送去。飲食供養。房舍臥具。繩牀木牀。事事給與。若無物。應賣自身及男女身。割自身肉賣。供給所須。悉以與之。若有檀越來請眾僧。客僧有利養分。僧坊主應次第差客僧受請。而先住僧獨受請。而不差客僧者。僧坊

主得無量罪。畜生無異。非沙門。非釋種姓。犯輕垢罪。

第二十七受別請戒

若佛子。一切不得受別請利養入己。而此利養屬十方僧。而別受請。即是取十方僧物入己。及八福田中。諸佛聖人一一師僧父母病人物自己用故。犯輕垢罪。

第二十八別請僧戒

若佛子。有出家菩薩。在家菩薩。及一切檀越。請僧福田求願之時。應入僧坊問知事人。今欲請僧求願。知事報言。次第請者。即得十方賢聖僧。而世人別請五百羅漢菩薩僧。不如僧次一凡夫僧。若別請僧者。是外道法。七佛無別請法。不順孝道。若故別請僧者。犯輕垢罪。

第二十九邪命自活戒

若佛子。以惡心故。為利養。販賣男女色。自手作食。自磨自chōng春。占相男女。解夢吉凶。是男是女。咒術工巧。調鷹方法。和合百種毒藥。千種毒藥。蛇毒。生金銀毒。蠱毒。都無慈愍心。無孝順心。若故作者。犯輕垢罪。

第三十不敬好時戒

若佛子。以惡心故。自身謗三寶。詐現親附。

口便說空。行在有中。經理白衣。為白衣通致男女。交會婬色。作諸縛著。於六齋日。年三長齋月。作殺生劫盜。破齋犯戒者。犯輕垢罪。

如是十戒。應當學。敬心奉持。制戒品中廣明。

第三十一不行救贖戒

佛言。佛子。佛滅度後。於惡世中。若見外道。一切惡人。劫賊。賣佛菩薩父母形像。及賣經

律。販賣比丘比丘尼。亦賣發菩提心菩薩道人。或為官使。與一切人作奴婢者。而菩薩見是事已。應生慈悲心。方便救護。處處教化取物。贖佛菩薩形像。及比丘比丘尼。發心菩薩。一切經律。若不贖者。犯輕垢罪。

第三十二損害眾生戒

若佛子。不得販賣刀杖弓箭。畜輕秤小鬥。因官形勢。取人財物。害心繫縛。破壞成功。長養貓

狸豬狗。若故養者。犯輕垢罪。

第三十三邪業覺觀戒

若佛子。以惡心故。觀一切男女等門。軍陣
兵將。賊等鬥。亦不得聽吹貝。鼓角。琴。瑟。
箏。笛。
kōng 瓮。
hóu 簠。
歌叫妓樂之聲。不得 chū 横蒲。
圍 qí 槩。
波羅塞戲。彈。
qí 槩。
六博。拍毬。
zhì 滴。
石投壺。
牽道八道行城。
爪鏡。
shī 蒜草。
楊枝。
鉢

孟。dú髑lóu髑。而作卜shī筮。不得作盜賊使命。一一
不得作。若故作者。犯輕垢罪。

第三十四 暫念小乘戒

若佛子。護持禁戒。行住坐臥。日夜六時。讀誦是戒。猶如金剛。如帶持浮囊。欲渡大海。如草繫比丘。常生大乘善信。自知我是未成之佛。諸佛是已成之佛。發菩提心。念念不去心。若起一念二

乘外道心者。犯輕垢罪。

第三十五不發願戒

若佛子。常應發一切願。孝順父母師僧。願得好師。同學善知識。常教我大乘經律。十發趣。十長養。十金剛。十地。使我開解。如法修行。堅持佛戒。寧捨身命。念念不去心。若一切菩薩。不發是願者。犯輕垢罪。

第三十六不發誓戒

若佛子。發是十大願已。持佛禁戒。作是誓言。寧以此身投熾然猛火。大坑刀山。終不毀犯三世諸佛經律。與一切女人作不淨行。復作是願。寧以熱鐵羅網。千重周匝纏身。終不以此破戒之身。受於信心檀越一切衣服。復作是願。寧以此口吞熱鐵丸。及大流猛火。經百千劫。終不以此破戒之。

口。食於信心檀越百味飲食。復作是願。寧以此身臥大流猛火。羅網熱鐵地上。終不以此破戒之身。受於信心檀越百種牀座。復作是願。寧以此身受三百矛刺身。經一劫二劫。終不以此破戒之身。受於信心檀越百味醫藥。復作是願。寧以此身投熱鐵鑊。經百千劫。終不以此破戒之身。受於信心檀越千種房舍屋宅。園林田地。復作是願。寧以鐵鎌打碎此身。從頭至足。令如微塵。終不以此破戒之

身。受於信心檀越恭敬禮拜。復作是願。寧以百千
熱鐵刀矛。挑其兩目。終不以此破戒之心。視他好
色。復作是願。寧以百千鐵錐。chán剗刺耳根。經一

劫二劫。終不以此破戒之心。聽好音聲。復作是
願。寧以百千刃刀。割去其鼻。終不以此破戒之
心。貪嗅諸香。復作是願。寧以百千刃刀。割斷其
舌。終不以此破戒之心。食人百味淨食。復作是
願。寧以利斧。斬破其身。終不以此破戒之心。貪

著好觸。復作是願。願一切眾生。悉得成佛。而菩薩若不發是願者。犯輕垢罪。

第三十七冒難遊行戒

若佛子。常應二時頭陀。冬夏坐禪。結夏安居。常用楊枝。澡豆。三衣。瓶。鉢。坐具。錫杖。香爐lián。奩。漉水囊。手巾。刀子。火燧。鑷子。繩牀。經。律。佛像。菩薩形像。而菩薩行頭

陀時。及遊方時。行來百裏千裏。此十八種物。常隨其身。頭陀者。從正月十五日。至三月十五日。八月十五日至十月十五日。是二時中。此十八種物。常隨其身。如鳥兩翼。若布薩日。新學菩薩。半月半月常布薩。誦十重四十八輕戒。若誦戒時。當於諸佛菩薩形像前誦。一人布薩。即一人誦。若二人三人至百千人。亦一人誦。誦者高座。聽者下座。各各披九條七條五條袈裟。若結夏安居時。亦

應一一如法。若行頭陀時。莫入難處。若惡國界。
若惡國王。土地高下。草木深邃。師子虎狼。水
火風難。及以劫賊。道路毒蛇。一切難處。悉不得
入。頭陀行道。乃至夏坐安居。是諸難處。皆不得
入。若故入者。犯輕垢罪。

第三十八乖尊卑次序戒

若佛子。應如法次第坐。先受戒者在前坐。後

受戒者在後坐。不問老少。比丘。比丘尼。貴人。
國王。王子。乃至黃門。奴婢。皆應先受戒者在前
坐。後受戒者次第而坐。莫如外道癡人。若老若
少。無前無後。坐無次第。如兵奴之法。我佛法
中。先者先坐。後者後坐。而菩薩一一不如法次第
坐者。犯輕垢罪。

第三十九不修福慧戒

若佛子。常應教化一切眾生。建立僧坊山林園

田。立作佛塔。冬夏安居。坐禪處所。一切行道處。皆應立之。而菩薩應為一切眾生。講說大乘經律。若疾病。國難。賊難。父母。兄弟。和尚。阿闍黎。亡滅之日。及三七日。四五七日。乃至七七日。亦應講說大乘經律。一切齋會求願。行來治生。大火所燒。大水所漂。黑風所吹船舫。江河大海羅刹之難。亦讀誦講說此經律。乃至一切罪報。三惡。八難。七逆。杻械枷鎖。繫縛其身。多婬。

多瞋。多愚癡。多疾病。皆應講此經律。而新學菩薩若不爾者。犯輕垢罪。

如是九戒。應當學。敬心奉持。梵壇品當廣明。

第四十揀擇受戒戒

若佛子。與人授戒時。不得揀擇。一切國王。王子。大臣。百官。比丘。比丘尼。信男。信女。婬男。婬女。十八梵天。六欲天子。無根。二根。

黃門。奴婢。一切鬼神。盡得受戒。應教身所著袈裟。皆使壞色。與道相應。皆染使青黃赤黑紫色。一切染衣。乃至臥具。盡以壞色。身所著衣。一切染色。若一切國土中。國人所著衣服。比丘皆應與其俗服有異。若欲受戒時。師應問言。汝現身不作七逆罪不。菩薩法師。不得與七逆人現身受戒。七逆者。出佛身血。弑父。弑母。弑和尚。弑阿闍黎。破羯磨轉法輪僧。弑聖人。若具七逆。即現身

不得戒。餘一切人。盡得受戒。出家人法。不向國王禮拜。不向父母禮拜。六親不敬。鬼神不禮。但解法師語。有百裏千裏來求法者。而菩薩法師。以惡心瞋心。而不即與授一切眾生戒者。犯輕垢罪。

第四十一為利作師戒

若佛子。教化人起信心時。菩薩與他人作教誡法師者。見欲受戒人。應教請二師。和尚阿闍黎二

師。應問言。汝有七遮罪不。若現身有七遮罪者。師不應與受戒。若無七遮者。得與受戒。若有犯十重者。應教懺悔。在佛菩薩形像前。日夜六時。誦十重四十八輕戒。苦到禮三世千佛。得見好相。若一七日。二三七日。乃至一年。要見好相。好相者。佛來摩頂。見光見華。種種異相。便得滅罪。若無好相。雖懺無益。是人現身亦不得戒。而得增益受戒。若犯四十八輕戒者。對首懺悔。罪便得

滅。不同七遮。而教誠師。於是法中。一一好解。若不解大乘經律。若輕若重。是非之相。不解第一義諦。習種性。長養性。性種性。不可壞性。道種性。正法性。其中多少。觀行出入。十禪支。一切行法。一一不得此法中意。而菩薩為利養故。為名聞故。惡求多求。貪利弟子。而詐現解一切經律。為供養故。是自欺詐。亦欺詐他人。故與人授戒者。犯輕垢罪。

第四十二為惡人說戒戒

若佛子。不得為利養故。於未受菩薩戒者前。
若外道惡人前。說此千佛大戒。邪見人前。亦不得
說。除國王。餘一切不得說。是惡人輩。不受佛
戒。名為畜生。生生之處。不見三寶。如木石無
心。名為外道。邪見人輩。木頭無異。而菩薩於是
惡人前說七佛教戒者。犯輕垢罪。

第四十三無慚受施戒

若佛子。信心出家。受佛正戒。故起心毀犯聖
戒者。不得受一切檀越供養。亦不得國王地上行。
不得飲國王水。五千大鬼常遮其前。鬼言大賊。若
入房舍城邑宅中。鬼復常掃其腳跡。一切世人皆罵
言。佛法中賊。一切眾生。眼不欲見。犯戒之人。
畜生無異。木頭無異。若故毀正戒者。犯輕垢罪。

第四十四不供養經典戒

若佛子。常應一心受持讀誦大乘經律。剝皮為紙。刺血為墨。以髓為水。析骨為筆。書寫佛戒。木皮穀紙。絹素竹帛。亦悉書持。常以七寶。無價香華。一切雜寶為箱囊。盛經律卷。若不如法供養者。犯輕垢罪。

第四十五不化眾生戒

若佛子。常起大悲心。若入一切城邑舍宅。見

一切眾生。應當唱言。汝等眾生。盡應受三歸十戒。若見牛馬豬羊。一切畜生。應心念口言。汝是畜生。發菩提心。而菩薩入一切處。山林川野。皆使一切眾生發菩提心。是菩薩若不發教化眾生心者。犯輕垢罪。

第四十六說法不如法戒

若佛子。常應教化。起大悲心。若入檀越貴人

家。一切眾中。不得立為白衣說法。應在白衣眾前。高座上坐。法師比丘。不得地立為四眾說法。若說法時。法師高座。香華供養。四眾聽者下坐。如孝順父母。敬順師教。如事火婆羅門。其說法者。若不如法說。犯輕垢罪。

第四十七非法制限戒

若佛子。皆已信心受佛戒者。若國王。太子。

百官。四部弟子。自恃高貴。破滅佛法戒律。明作制法。制我四部弟子。不聽出家行道。亦復不聽造立形像。佛塔經律。立統官制眾。使安籍記僧。菩薩比丘地立。白衣高座。廣行非法。如兵奴事主。而菩薩正應受一切人供養。而反為官走使。非法非律。若國王百官。好心受佛戒者。莫作是破三寶之罪。若故作破法者。犯輕垢罪。

第四十八破法戒

若佛子。以好心出家。而為名聞利養。於國王百官前說佛戒者。橫與比丘比丘尼菩薩戒弟子。作繫縛事。如獄囚法。如兵奴之法。如師子身中蟲。自食師子肉。非餘外蟲。如是佛子。自破佛法。非外道天魔能破。若受佛戒者。應護佛戒。如念一子。如事父母。不可毀破。而菩薩聞外道惡人。以惡言謗破佛戒之聲。如三百矛刺心。千刀萬杖打拍。

其身。等無有異。寧自入地獄。經於百劫。而不一聞惡人以惡言謗破佛戒之聲。而況自破佛戒。教人破法因緣。亦無孝順之心。若故作者。犯輕垢罪。如是九戒。應當學。敬心奉持。

諸佛子。是四十八輕戒。汝等受持。過去諸菩薩已誦。未來諸菩薩當誦。現在諸菩薩今誦。

諸佛子聽。十重四十八輕戒。三世諸佛已誦。當誦。今誦。我今亦如是誦。汝等一切大眾。若國

王。王子。百官。比丘。比丘尼。信男。信女。受持菩薩戒者。應受持讀誦解說書寫。佛性常住戒卷。流通三世。一切眾生。化化不絕。得見千佛。為千佛授手。世世不墮惡道八難。常生人道天中。我今在此樹下。略開七佛法戒。汝等大眾。當一心學波羅提木叉。歡喜奉行。如無相天王品勸學中。一一廣明。三千學士。時座聽者。聞佛自誦。心心頂戴。歡喜受持。

爾時釋迦牟尼佛。說上蓮華臺藏世界。盧舍那佛所說心地法門品中。十無盡戒法品竟。千百億釋迦亦如是說。從摩醯首羅天王宮。至此道樹下。十住處說法品。為一切菩薩。不可說大眾。受持讀誦。解說其義亦如是。千百億世界。蓮華藏世界。微塵世界。一切佛心藏。地藏。戒藏。無量行願藏。因果佛性常住藏。如是一切佛說。無量一切法藏竟。千百億世界中。一切眾生受持。歡喜奉行。若

廣開心地。相相。如佛華光王七行品中說。

明人忍慧強 能持如是法

未成佛道間 安獲五種利

一者十方佛 懿念常守護

二者命終時 正見心歡喜

三者生生處 為諸菩薩友

四者功德聚 戒度悉成就

五者今後世 性戒福慧滿

此是諸佛子 智者善思量
計我著相者 不能生是法
滅壽取證者 亦非下種處
欲長菩提苗 光明照世間
應當靜觀察 諸法真實相
不生亦不滅 不常復不斷
不一亦不異 不來亦不去
如是一心中 方便勤莊嚴

菩薩所應作 應當次第學
於學於無學 勿生分別想
是名第一道 亦名摩訶衍
一切戲論惡 悉從是處滅
諸佛薩婆若 悉由是處出
是故諸佛子 宜發大勇猛
於諸佛淨戒 護持如明珠
過去諸菩薩 已於是中學

未來者當學 現在者今學
此是佛行處 聖主所稱歎
我已隨順說 福德無量聚
回以施眾生 共向一切智
願聞是法者 悉得成佛道

優婆塞五戒威儀經

宋罽賓三藏求那跋摩譯

佛者眾聖尊 神通應自在

隨類處身形 音聲亦復爾

見聞獲安隱 莫不信向心

是故我歸命 願普如世尊

甚深菩薩戒 功德難思議

受者獲安隱 福慧日夜生

諸佛常護念 萬行漸滿盈
六度四等意 普度諸群盲
手足初莫犯 節言順所行
常樂在定意 是名真比丘
質直離詭曲 常與賢聖俱
愛眾猶養己 是名真菩薩

諸大德！一心諦聽諦聽，善思念之。我今欲說三世諸佛菩薩成就利益一切眾生功德戒。如是住菩

薩戒者，有四波羅夷法。何等為四？若菩薩為利養故自讚毀他，是名菩薩波羅夷。若菩薩多饒財物，貧苦之人來從乞索，菩薩慳貪無有慈心，乃至不施一錢之物，有求法者乃至不為說於一偈，是名菩薩波羅夷。若菩薩瞋，於前人惡言罵辱，加以手打及以杖石意猶不息，前人求悔善言懺謝，菩薩猶瞋憤結不解，是名菩薩波羅夷。若菩薩自謗菩薩法藏，若見人謗善可其言，既自不信反助他言，若心自解

或從他受，是名菩薩波羅夷。如是菩薩四波羅夷，菩薩於中不應犯一，何況具犯！若有犯者，不名菩薩。現身不能莊嚴菩提，亦復不能令心寂靜，是似菩薩非實菩薩。犯有三種：有軟、中、上。若軟、中心犯，是不名失。若是增上心犯，是名為失。何者是上？若犯上四，數數樂犯，心無慚恥、不自悔責，是名上犯。菩薩雖犯於上四事，不即永失。如比丘犯四即為永棄。菩薩不爾。何以故？比丘犯四

更無受路。菩薩雖犯，脫可更受，是故不同。略有二事失菩薩戒，一捨菩提願、二增上惡心。除是二事，若捨此身戒終不失。從是以後生生之處常有此戒，若不憶念，更遇善友而更受者，不名新得。如是菩薩戒者，應當識知犯不犯事輕重之相、軟中上異。

如是住菩薩戒者，日應供養諸佛若塔若像，次供養法若行法人及菩薩藏大乘經典，供養眾僧及十

方土住於大地諸菩薩等。於日夜中供養三寶，隨其
力能，乃至一念一禮一四句誦信心供養，勿令有
廢。若不恭敬慢墮心者，犯重垢罪。若忘誤者，犯
輕垢罪。不犯者，若病若狂，若有淨心逮菩薩地、
如須陀洹得不壞淨心，常能供養三寶不絕，是名不
犯。菩薩不知厭足，貪著利養不制心者，犯重垢
罪。不犯者，雖貪利養常生悔心：我當精進斷除是
意。極自制御貪心猶起、若取小利助斷大貪，是名

不犯。

菩薩，見上座尊長耆宿德同師同學，生惱慢心及瞋惡心，不起承迎禮拜避座，設有言語餘談不聽，若有所問不如實答者，犯重垢罪。若無慢瞋恚癡之意，直以懶惰無記散心，犯輕垢罪。不犯者，若病若狂若時睡眠，若聽法說法，若先共他人語，若為調伏滅惡增善，若有僧限護多人意，是名不犯。

菩薩，檀越來請，若於自舍、若僧寺內給施所

須，菩薩憍慢瞋恚輕賤不往受者，犯重垢罪。若懶惰不往，犯輕垢罪。不犯者，若病若狂，若遠若道嶮難，若為調伏滅惡增善，若失受請，若為修善，若聽未聞，若知請主欲相惱故，若有僧限護多人意，是名不犯。

菩薩，從他人邊得金銀琉璃種種雜寶所須之物，及地中伏藏無主財物，皆應取之，念當轉施。若惡心瞋故不取者，犯重垢罪。若作是心：我不與

人。而作因緣，若懶惰心，犯輕垢罪。不犯者，若是狂心，若為調伏滅惡增善，若知受已必生愛著，若知施已生悔，若知施主施故發狂，若慮施主施己窮苦，若知施物三寶所有，若知施物劫盜所得，若知受已多得苦惱，所謂王難、賊盜、死亡、繫閉、惡聲流布、擯令出境界，是名不犯。

菩薩，他來求法，以瞋惡心憎嫉他故不與說者，犯重垢罪。若懶惰心不與說者，犯輕垢罪。不

犯者，若外道求法慮還譏刺，若病若狂，若為調伏滅惡增善，若知前人不解其義，若前人不敬不如法事，若前人鈍根不解深法恐生邪見，若知聞已破失本心壞滅正法，若知聞已必向非器宣說其事，是名不犯。

菩薩，見惡眾生犯戒毀禁作眾罪行，菩薩自知能化為善，若惡心瞋心捨不教者，犯重垢罪。何以故？菩薩不於身口意淨持戒人邊起於悲心。若見惡

人犯戒毀禁作眾罪行，極生悲心，是故有犯。不犯者，若狂，若為調伏滅惡增善，若有僧限護多人意，是名不犯。

菩薩，如佛所制波羅提木叉及結毘尼，欲使不信者信，已信者增，此聲聞戒及菩薩戒等無有異。何以故？聲聞之人順常自為，猶欲學令不信者信、已信者增。何況菩薩所修學，常為眾生，豈不能爾！是故名同不犯。

如佛所制，聲聞之人應少欲作、少因緣事。菩薩不爾。何以故？順求自利、不為他人，是聲聞好。菩薩若爾則不名菩薩。為他人故，所可受衣乃至百千，從非親里婆羅門居士盡力所求。如衣，鉢亦如是。為他人故，及應乞縷教織師織、畜惰奢耶衣、受取金銀乃至百千，如是之事與聲聞異。若菩薩本為眾生，而瞋惡心少作、少因緣事，放捨眾生獨居其所者，犯重垢罪。若懶惰心，少欲少事居其

所者，犯輕垢罪。

菩薩有五非法：一諂、二華、三相、四以利求利、五邪命。有此五事，以不為愧不制不息者，犯重垢罪。不犯者，覺是非法常欲制之，是名不犯。

菩薩，戲笑散亂高聲唱說，作非威儀令他人笑。為眾所輕者，犯重垢罪。若是宿習忘誤作者，犯輕垢罪。不犯者，覺是非法常欲制之，若外人瞋恚欲調伏故，若人苦惱為令釋故，若欲攝取戲笑

故，若二人共諍為和合故，是名不犯。

菩薩，如是見、如是語：菩薩不應樂於涅槃，應背涅槃，不應畏煩惱、不應滅煩惱。何以故？菩薩三阿僧祇往來生死故。

如是語者，犯重垢罪。何以故？如菩薩樂於涅槃、畏於煩惱，比於聲聞千萬倍不可為喻。何以故？聲聞之人順自為己，菩薩常為一切眾故。菩薩雖處有漏，於滅煩惱而得自在，過於羅漢處無漏者

上。若菩薩起身口業應自防護，莫使他人慢惰罪。若故不自護使他惰罪者，犯重垢罪。若不作意自護，放散所作生他罪者，犯輕垢罪。不犯者，若外道，若隨出家如法所作，若值多瞋惡人，是名不犯。

菩薩，見前眾生須加杖痛然後有利，自護不治者，犯輕垢罪。不犯者，若利少苦多，是名不犯。

菩薩，以罵報罵、以瞋報瞋、以打報打、以牽挽者，犯重垢罪。

菩薩，與他共鬪及共相嫌，惡心瞋心、若憍慢心，不如法悔者，犯重垢罪。若懶惰放逸一不求悔者，犯輕垢罪。不犯者，若為調伏滅惡增善，若彼外道要作非法，若彼恚鬪怨更增上，若知彼人終不受悔，若向彼悔起彼重慢，是名不犯。

菩薩，共他嫌恨，他如法求悔，菩薩惡心不受，為惱他者，犯重垢罪。若無瞋心，不受他悔，犯輕垢罪。不犯者，若為調伏滅惡增善，若惡非

法，是名不犯。

菩薩，瞋他受者瞋事不休息者，犯重垢罪。不犯者，若常制之瞋心猶起，是名不犯。

菩薩，受畜徒眾，但為給事及與衣食，是名犯。

菩薩，起懶惰意，樂於非時食，貪著睡眠若倚若臥者，犯重垢罪。不犯者，若病若狂無巧便，若道路行極，若常制之，是名不犯。

菩薩，以染著心談說世樂事者，犯重垢罪。若

忘誤說，犯輕垢罪。不犯者，若有人問正心少說，若談異聞，若談論法事，是名不犯。

菩薩，樂欲坐禪，知他有法，以瞋慢心不能下意從他求受法者，犯重垢罪。若懶惰心不求受者，犯輕垢罪。不犯者，若病若無巧便，若知彼人不順法教，若自有巧便多聞攝其心者，是名不犯。

菩薩，起欲界欲，不觀對治疾除滅者，犯重垢罪。不犯者，常勤欲滅欲心猶起，是名不犯。如

欲，餘蓋亦爾。若菩薩貪味於禪著功德者，犯重垢罪。不犯者，常欲捨著著心猶起，是名不犯。

菩薩，如是見、如是語：菩薩不應聽受誦學聲聞法藏。菩薩之人用學是為？作是語者，犯重垢罪。何以故？菩薩於外道書尚應當學，何況佛語！不犯者，為欲調伏聲聞入大乘故，是名不犯。

菩薩法藏一向捨置，貪學讀誦聲聞經者，犯輕垢罪。

菩薩，有佛經藏不能勤學，乃更勤學外道俗典，犯重垢罪。不犯者，若極根利一聞能持，同佛語者取用助化，以彼妙辭助明佛法，於佛法於佛經義意不傾動，是名不犯。

菩薩，欲學外道經典，應如上學。若於中受樂生著心，不如服苦藥者，犯重垢罪。

菩薩，若聞菩薩法藏，甚深祕密第一實義不思議事，純是諸佛菩薩境界，於此義中生誣謗心言：

此義無益，非佛所說，不能祐利一切眾生。作是謗者，犯重垢罪。不犯者，若思惟定義，若方便說，是名不犯。

菩薩，聞於甚深義時若不生信，以不諂心為生信故應作是念：我不應爾。我如盲者無有慧眼。佛口所說我云何謗？如是菩薩自憤由癡，是佛境界非我所及，若能如是是為正行。若意不解不生誹謗，是名不犯。

菩薩，為飲食故，以瞋惡心自讚毀他，犯重垢罪。不犯者，若為伏外道，若伏憍慢增長佛法，若為不信者信、已信者增，是名不犯。

菩薩，有說法家、若說毘尼處、大法會處，瞋嫉慢心不往聽者，犯重垢罪。若懶惰心不往聽者，犯輕垢罪。不犯者，若自不聞又無人喚，若病若無巧便，若知彼說法不順義理，若知說者於己有難，若知彼說更無異聞，若得總持自多聞，若勤修善

根，是名不犯。

菩薩，有人來倩，我有事緣當為營辦，所謂共去共還營佐眾事，有所營了守護財物，和合鬭訟經辦飲食，修福德業。若一二事不為作者，犯重垢罪。若懶惰不為，犯輕垢罪。不犯者，若病若無巧便，若自有事，若彼能辦，若不相倩，若無益事，若為調伏滅惡增善，若無他倩，若報他作勤修善根，若自闇鈍恐失業次，若有僧限護多人意，是名不犯。

若菩薩，見病眾生，以惡心瞋心不瞻養者，犯重垢罪。若懶惰不養，犯輕垢罪。不犯者，若自有病，若無巧便，若倩他看，若彼病者自有屬眷，若知病者能自經給，若久病，若人猶能起止，若欲勤修增上善根，若極自闇鈍恐失黨次，若失看病如病餘，貧窮苦惱亦復如是，是名不犯。

菩薩，見前眾生應有利宜，無有方便而能發起。菩薩惡心瞋心不教示者，犯重垢罪。若懶惰不

教，犯輕垢罪。不犯者，若無方便，若使他教，若彼自有善知識，若為調伏滅惡增善，若示彼方便更瞋反戾，無有敬愛心彊得自用，是名不犯。

菩薩，眾生給施所須，應念其恩。若惡心瞋心不念恩報恩者，犯重垢罪。若懶惰不報，犯輕垢罪。不犯者，若自無力，若無巧便，若為調伏滅惡增善，若欲念報施主不受，是名不犯。

菩薩，見人親里死亡，若亡失財物種種憂苦。

若惡心瞋心不往慰喻者，犯重垢罪。不犯者，如前
倩菩薩中說。

菩薩，有人從索飲食，所須不與者，犯重垢
罪。不犯者，若自無物，若索不淨物，若為調伏滅
惡增善，若王所制，若護僧限，是名不犯。

菩薩，弟子應隨時教誨。若弟子有乏，應從篤
信人邊勸索供給。若惡心瞋心不教誨、不供給者，
犯重垢罪。若懶惰心不教供給，犯輕垢罪。不犯

者，若為調伏滅惡增善，若護僧限，若病若無巧便，若倩人教，若弟子福德能致供養，若弟子本是外道無好善心，是名不犯。

菩薩，以瞋心惡心不護他意者，犯重垢罪。若懶惰放逸不護他意，犯輕垢罪。不犯者，若非法事，若病，若有僧限護多人意，若外道，若為調伏滅惡增善，是名不犯。

菩薩，見他德行不能稱讚，以惡心瞋心隱藏他

善者，犯重垢罪。若懶惰放逸不稱他善，犯輕垢罪。不犯者，若知彼人不樂讚歎，若病若無巧便，若為調伏滅惡增善，護僧限，若知聞讚更生嬌慢，若彼無實德，若言似善實無善義，若為外道，若讚時未到，是名不犯。

菩薩，為多人頭首，見諸眷屬不如法事應呵應擯。若瞋心惡心捨不呵治者，犯重垢罪。若懶惰放逸不教呵者，犯輕垢罪。不犯者，若知彼人惡性健

瞋不受教呵，若待時教呵，若畏破僧，若知彼質直宿習少羞喜數犯悔，是名不犯。

菩薩，有神通變化，應為眾生隨時變現，或方便恐怖令生信心。若畏信施不現變化者，犯輕垢罪。不犯者，若人深著惡法邪見，若是外道，若罵賢聖，若著邪見，若狂若病，是名不犯。

菩薩，戒聚成就具足無量妙果，以是戒聚因緣力故具足尸波羅蜜。受者雖未得阿耨多羅三藐三菩提

提，以得具足五事功德：一者常為諸佛菩薩所護念；二者受常淨樂；三者臨終無悔；四者捨身得生諸佛世界；五者莊嚴阿耨多羅三藐三菩提。菩薩受持菩薩戒者，不自為身唯為利他，及莊嚴阿耨多羅三藐三菩提。是菩薩戒，悉是過去未來現在恒河沙等諸佛菩薩之所成就，乃至十方諸佛菩薩亦復如是。菩薩弘慈普恩，及六道眾生、三塗八難，苦惱十方無不蒙益。

功德不可計 福慧如虛空
略說共要竟 歡喜禮奉行
普發菩提心 福慧命得成
慈悲男女長 喜捨次第生
一切成佛道 永盡無有餘
十方同其願 巍巍無極尊

欲為菩薩優婆塞，放逸五戒威儀者，若無師從受處，爾時受者若無師，應向佛像前自誓受。菩薩

優婆塞威儀應如是作禮，偏袒右肩胡跪合掌，應如是言：我某甲白十方佛及住大地諸菩薩等，今於諸佛前欲受一切戒，學一切菩薩戒、優婆塞五戒威儀，攝一切善法菩薩戒，為利眾生戒。是戒過去諸菩薩已學，未來諸菩薩當學，現在諸菩薩今學，我亦如是學。第二第三亦如是說竟。其餘諸事應如前廣說。

離欲優婆塞具行五戒，遠離身四惡：一者殺、二者盜、三者婬、四者飲酒。遠離口五惡：一者妄

語、二者惡口、三者兩舌、四者無義語、五者綺語。遠離五邪命：一者賣肉、二者沽酒、三者賣毒、四者賣眾生、五者賣兵仗。遠離嚴飾五事：一者香、二者花、三者瓔珞、四者香油塗身、五者香薰衣。遠離放逸五事：一者歌、二者舞、三者作樂、四者嚴飾樂器、五者不往觀聽。此五戒隨力所堪，若能終身具持五為上；若不能，隨持多少年月日夜，乃至須臾亦得暫持。不但如持全念。佛臨涅槃

槃勅四大聲聞及六應真：吾滅度後，如是真法之中，若出家二眾淨持禁戒，及在家二眾隨力多少，心次近持上戒者，若造房舍床褥衣服飲食，一切順道資生之具，施四方僧及諸賢聖。汝等盡應受請；若不受者得罪。以此觀之，賢聖不遠感至則應。若作功德，先當竭力受持上戒，然後至心請四方僧及諸賢聖。若不能終身，至一日一夕者善。若不能者，設供之時便受，罷便止。此諸賢聖皆來受請，

若有所犯即如法悔。此一切菩薩犯，當突吉羅罪。
當向大小乘人能解說、能受悔者如法懺悔。

若菩薩，以增上煩惱犯波羅夷處法者，失律儀
戒，應當更受。若中煩惱犯波羅夷處法者，當向三
人若過三人長跪合掌，作突吉羅懺悔。所犯罪多，
作是說言：大德憶念！我某甲捨菩薩毘尼。如所稱
事，犯突吉羅罪。餘如比丘突吉羅罪懺悔法說。若
下煩惱犯波羅夷處法及餘所犯，向一人懺。

三禮文。

願十方法界世性六道，三業罪障垢惑眾生，崩
顛倒山竭四流濟，登平等道入無為國。歸命敬禮七
處八會盧舍那佛，盡十方國諸妙覺尊。

願十方法界世性六道，沈淪諸有長沒眾生，摧
破戒林殄滅邪照。歸命敬禮七處八會佛華嚴藏，盡
十方國修多羅海。

願十方法界世性六道，小心膠固顛倒眾生，頓

絕偏照須證住想，永附大乘盡未來際。歸命敬禮七處八會普賢眾等，盡十方國諸賢聖僧。

若欲發心去時當立五願：一者願令我早棄此身。二者願師僧父母使不愁惱，令我身命疾至菩提。三者願至阿蘭若處行，若有虎狼惡毒虫獸來欲噉我，我不恐怖，猶如比丘得第三禪樂。四者若我至阿蘭若處，若天雨風起，或有惡鬼毒龍來欲螫我，我心安隱亦不恐怖。猶如有人欲度大海，到水

中央天忽風起，波浪甚大度者恐怖，天風即定，度到彼岸心大歡喜。願我亦爾，疾到菩提無上彼岸。五者願我到阿蘭若處，若當病時，願得諸天來至我所，教導我等使心不悔。我復念言：我此身中有四毒蛇同俱止中，猶如四蛇同共一窟。蛇欲出時，各相謂言我前去，諍窟不出死在窟中，猶瞋諍故四俱滅亡。我今身中有四毒蛇，鬪諍瞋恚在我身中。作如是念，病得即除菩提心起，令心得安六識不亂，

安心蘭若四行具足，安心禪定制伏六情。是第五願。

發此願已禮四方佛，乃有十拜，作如是言：諸佛世尊！哀愍我等、覆護我等，使我得無上道疾至菩提。我今懺悔。我某甲，歸依佛、歸依法、歸依僧，十地菩薩、辟支、羅漢諸賢聖等。我從無數劫以來流轉生死，百生千生無量億生，或墮六趣受生異報，或作餓鬼畜生，受如此苦常不得樂。我自尋思過惑自纏，不覩聖道，障涅槃門、閉甘露戶，塞

眾善道不聞正法，沈沒大海有如此苦罪。今悉懺悔五體投地。如此投地七遍亦然。當投地時發如此言：願去我身無量眾毒，拔出邪愚無量眾毒，拔出邪愚無量塵惑，心意清淨六念成就。使我到阿蘭若處，心無恐怖疾到菩提，開涅槃門啟甘露戶，塞地獄門閉三惡道，拔三毒根出三界網，得三樂證三果真，超生死危當得智慧，離最後身疾至菩提。發此願已從地而起，禮十方佛訖竟，合掌立住心懷歡

喜，作如是念：我罪永除。

受繩床法四種：一者請佛；二者請師；三脫革
屣偏袒右肩清淨；四右膝著地胡跪佛前。請師作如
是白：十方諸佛及大迦葉，親於佛前受阿蘭若法，
佛為作證明、師為作證知。若我四十五日，行於苦
行志不退轉，若生退心我即妄語，誑於諸天不到彼
岸。大德當證！請師復作是言：長老一心念！今於
佛前發此誓言，請大德為證。

汝若退者誑於他人，自墮地獄不免苦也。汝當

真成行阿蘭若行，得蘭若智。如是受持。答言：如是。三說。

受錫杖法。長跪大德前，如是三白：大德一心念！今請大德師。如是三白。大德作如是言：長老一心念！汝今發無上心，受持如法用。不得不淨手捉入僧房，應當脫樓纂，不得近地。若入白衣舍，應纂在後。若中前須詣白衣舍，或受中食，種種因緣當三喚，三若不來者乃至五，五若不來者乃至七。七若不來更至餘家。乃至七家，七家不得。於

是中第二第三亦如是說。

捨法戒。

長老一心念！比丘某甲，優婆塞五戒威儀者，何緣而生日滿後不死，不墮地獄中間。白十方佛及大迦葉，皆當善聽。某甲豎標如是。三白衣訖，捉標豎樹竟，復作如是白：十方諸佛、四方淨行大德悉為證知：某不欺，誑於諸天，不到彼岸。今齋法床及如法杖，悉皆具足。今以結坐，一切行蘭若比丘亦皆結坐。如是三白，作禮六拜，合掌一心如是。

念：念十方諸佛及大迦葉！比丘某甲，優婆塞某甲，眾念成就。今解坐向餘處還結。若欲捉繩床時，應作四念。第一念者，念我身中皆是無常，應當苦之。二者苦身修習空智自至，宜當修之。三者當起忍心，莫生瞋怒。四生歡喜心，若生歡喜心疾至菩提。作此念已，向彼放牛虎狼、大聲小聲、姪聲及迫迮，悉皆遠離。離此聲已安心端念。欲去諸塵時，當作二念言：一者令我身中得安隱定，不生疲極疾到菩提。二者當得閑靜心無錯亂，六識安隱

得滅盡定。安詳放床，立住禮佛乃至十拜。立住合掌便作三念：一者念佛、二者念戒、三者念禪定。作此念已，便向繩床安詳而坐。復作六念：一者念諸佛護念我念成就。二者念我戒身清淨，戒者謂波羅提木叉，念者是名不犯。從序至偈四事思得至於十三，念此十三，成就二不定，三十、九十四波羅提舍尼、眾多學法、七滅諍法，從上至下皆應實念。三者念報父母師僧之恩。四者念五欲皆是無常，大患之根本，昏網之元首。五者念地獄之苦。

惱，當勤修善遠離此苦。我已出家，宜應謹慎棄惡修善。六者念慧，若我有慧則應憶持，慧具足無事不辦者，得無上道。六念具足安心而坐。依禪法觀。

優婆塞若欲移時，當作三念：一者念我行時，地上蠢蠢多有虫蟻，我若誤殺時得何罪、死者生天。二者當念如法行，如法仰手捉杖在身，威儀齊整安詳而行。三者行不反顧，亦不搖頭動手。是名三念成就。

如法行來優婆塞，威儀篤信持食來時，當淨受

之。受得訖已結跏趺坐，復作四念：一者念我身中有八萬戶虫，虫得此食即皆安隱。二者念我得食當少食之，若少食者令我身輕，若身輕眾欲亦少，若欲少者疾至菩提。三者我不為美故，但為活命者，諸善成就；善若成就，成無上智。四者我食時，十方餓者悉令飽滿，皆悉奉行。

六、誦畢懺謝

某甲敬謝大眾，菩薩戒眾差誦戒，三業不勤，

戒文生澀，坐久延遲，令眾生惱，望眾慈悲，
佈施歡喜。

七、功德回向

誦戒功德殊勝行 無邊勝福皆回向
普願沉溺諸眾生 速往無量光佛刹
十方三世一切佛 一切菩薩摩訶薩
摩訶般若波羅蜜

南無護法韋馱尊天菩薩



回向偈

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國